



Politička organizacija građana "Naša stranka"

Branilaca Sarajeva 5/1, 71 000 Sarajevo

Telefon: 033 408 888; Fax: 033 408 881

E-mail: nasastranka@nasastranka.ba

Web: www.nasastranka.ba

Broj: _____/20
Sarajevo, 20.08.2020.

Skupština Kantona Sarajevo
Zastupnica Neira Dizdarević
Naša stranka

**BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
SKUPŠTINA KANTONA SARAJEVO
VLADA KANTONA SARAJEVO
MINISTARSTVO ZDRAVSTVA KS
MINISTARSTVO ZA OBRAZOVANJE, NAUKU I MLADE**

PREDMET: ZASTUPNIČKO PITANJE

Poštovani,

na osnovu članova 106. i 213. Poslovnika Skupštine Kantona Sarajevo („Službene novine Kantona Sarajevo - Drugi novi prečišćeni tekst br.: 41/12, 15/13, 47/13, 47/15 i 48/16) upućujem zastupničko pitanje Ministarstvu zdravstva i Ministarstvu za obrazovanje, nauku i mlade Kantona Sarajevo:

“Dana 18.08.2020. godine Ministarstvo za obrazovanje, nauku i mlade na osnovu Mišljenja Ministarstva zdravstva obavijestilo je javnost samo dan nakon što je naložilo provedbu Zaključka Skupštine Kantona Sarajevo broj **01-04-25003-8/20** od 28.07.2020. godine da se navedeni zaključak neće moći provesti zato što nema **neophodno zakonsko uporište**.

Na osnovu zahtjeva mnogobrojnih roditelja, iako još uvijek nisam dobila pravni akt na osnovu kojeg je Ministarstvo za obrazovanje, nauku i mlade promijenilo mišljenje molim oba Ministarstva da mi odgovore na sljedeće:

1. Molim da mi se dostave imena državnih službenika oba Ministarstva koji su radili na pravnim aktima vezano za provedbu zaključka, kao i pravnih akata koje su oba Ministarstva donosila vezano za problematiku ljekarskih uvjerenja za upis u osnovnu školu iz privatne prakse
2. Zašto JU Djeca Sarajeva prilikom upisa djece u vrtić uredno primaju ljekarska uvjerenja iz privatnih zdravstvenih ustanova, dok se za upis u osnovnu školu isto ne prihvata?
3. Zašto Ministarstvo za obrazovanje, nauku i mlade postupa po Mišljenju Ministarstva zdravstva KS koje **nije pravno obavezujuće**, niti je podzakonski akt

shodno **članu 67.** Zakona o organizaciji organa uprave u Federaciji BiH (Službene novine FBIH, 35/05)?

4. Zašto je Ministarstvo za obrazovanje, nauku i mlade u 2019. uprkos Mišljenju Ministarstva zdravstva KS akt broj **10-37-22278-1/19** od 21.06.2019. godine u kojem se navodi sličan stav kao i ove godine **nije postupilo** po tom aktu, nego u aktu broj **11/03-38-22278-2/19** od 05.07.2019. godine zbog **neinformisanosti roditelja prihvatio ljekarska** uvjerenja i iz privatnih zdravstvenih ustanova? Da li je ovo jasan dokaz neobavezujućeg postupanja po mišljenjima Ministarstva zdravstva KS ili je Ministarstvo za obrazovanje, nauku i mlade postupalo **protuzakonito** u 2019. godini? **Da li je pandemija korona virusa ipak veći razlog od neinformisanosti roditelja?**

5. Član **57. stav (2)** Zakona o osnovnom obrazovanju Kantona Sarajevo kao dokument koji roditelj dostavlja izričito spominje *‘ljekarsko uvjerenje o psihofizičkom stanju djeteta za upis u školu i zdravstvenom statusu s opisom poteškoća’* pri čemu **ne definiše** da je to ljekarsko uvjerenje samo iz **javne zdravstvene ustanove**, pa molim oba Ministarstva da mi pojasne na osnovu čega vrše **tumačenje** jasnog člana 57. sa pravno **neobavezujućim nižim pravnim aktom mišljenjem**, a da pri tome **nisu zatražili autentično tumačenje** koje prema **članu 117.** Poslovnika Skupštine Kantona Sarajevo (Službene novine Kantona Sarajevo, 41/12, 15/13, 47/13, 47/15, 48/16, 9/20, 14/20) može dati **samo Skupština Kantona Sarajevo**, a u vezi člana 57. stav (2) Zakona o osnovnom odgoju i obrazovanju KS (Službene novine KS 23/17) Skupština Kantona Sarajevo to nikada nije učinila.

6. Ministarstvo za obrazovanje, nauku i mlade u svome saopštenju za javnost od 18.08.2020. godine navodi dio Mišljenja Ministarstva zdravstva KS prema kome je *‘za izdavanje ljekarskog uvjerenja o psihofizičkom stanju djeteta za upis u školu i zdravstvenom statusu s opisom djeteta jedino mjerodavna Javna ustanova Dom zdravlja KS’* te na osnovu toga molim oba Ministarstva da mi pojasne **kako je jedina mjerodavna** za izdavanje ljekarskih uvjerenja za upis u osnovnu školu javna zdravstvena ustanova kada je takva tvrdnja:

- u **direktnoj suprotnosti** sa odredbama Zakona o zdravstvenoj zaštiti ("Službene novine Federacije BiH", broj 46/10) i to sa članovima **2. 13. 53. i 57.** istog, kojim se utvrđuje **ravnopravan položaj privatnih i javnih zdravstvenih ustanova;**

- u **direktnoj suprotnosti** sa **članom 51. stav (1)** Zakona o zdravstvenoj zaštiti u kojem se obavljanje pregleda i izdavanje ljekarskog uvjerenja **ne navodi kao isključiva djelatnost javnih zdravstvenih ustanova ;**

- u **direktnoj suprotnosti** sa **Pravilnikom o obimu i vrsti javnozdravstvene djelatnosti koja ne može biti predmetom privatne djelatnosti** (Službene novine FBIH 69/12, 39/14, 22/16) koji **ne navodi** pregled i izdavanje ljekarskih uvjerenja potrebnih za osnovnu školu kao isključivu djelatnost javnih zdravstvenih ustanova

7. Ministarstvo za obrazovanje, nauku i mlade u svome saopštenju za javnost od 18.08.2020. godine navodi dio Mišljenja Ministarstva zdravstva KS prema kome se jedino *‘vodi evidencija zdravstvenih kartona djece od rođenja do polaska u školu, i da jedino sadrže kompletnu medicinsku dokumentaciju o zdravstvenom stanju djeteta za cijeli taj period’* ,te *‘u kojoj se provodi obavezna imunizacija djece ovog uzrasta o čemu se za svako dijete vodi*

karton provedene imunizacije, što je u skladu sa Zakonom o evidencijama u oblasti zdravstva (Službene novine FBiH, broj 37/12) što apsolutno nije tačno jer:

- shodno **članu 6.** Zakona o evidencijama u oblasti zdravstva (Službene novine FBiH, broj 37/12) **nosioци privatne prakse kao i druga pravna i fizička lica** koja u okviru svoje djelatnosti obavljaju poslove iz oblasti zdravstva **dužni su voditi evidencije** u skladu sa ovim zakonom, propisima donesenim na osnovu ovog zakona, kao i Zakonom o zdravstvenoj zaštiti ("Službene novine Federacije BiH", broj 46/10), a Ministarstvo zdravstva Kantona Sarajevo **nije obavijestilo roditelje** da neka privatna zdravstvena ustanova **ne smije** izdavati ljekarska uvjerenja za upis u osnovnu školu, niti je **obavijestilo Federalnu upravu za inspeksijske poslove, kao niti Kantonalnu upravu za inspeksijske poslove** da privatne zdravstvene ustanove **protuzakonito izdaju ljekarska uvjerenja za upis u osnovnu školu**

- shodno **članu 43.** Zakona o evidencijama u oblasti zdravstva (Službene novine FBiH, broj 37/12) zdravstveni karton iz stava 1. ovog člana **prati svakog pacijenta tokom cijelog života**, a u slučaju promjene doktora medicine, zdravstvene ustanove ili mjesta stanovanja zdravstveni karton ili **prijepis** podataka iz zdravstvenog kartona obavezno se dostavlja novoj zdravstvenoj ustanovi, **odnosno privatnoj praksi** u kojoj pacijent ostvaruje prava na zdravstvenu zaštitu, tako da privatna zdravstvena ustanova može doći do bilo kojeg podatka iz zdravstvenog kartona djeteta što je **suprotno tvrdnji u saopštenju**

- shodno **članu 59.** Pravilnika o načinu provedbe obavezne imunizacije, imunoprofilakse i kemoprofilakse protiv zaraznih bolesti, te o osobama koje se podvrgavaju toj obavezi (Službene novine FBiH, broj 68/16) **svi podaci o izvršenoj imunizaciji** unose se u osnovnu dokumentaciju obveznika vakcinisanja - "Karton vakcinisanja" koji se nalazi u kartoteci punkta za vakcinaciju kojem gravitira osoba koja se vakciniše. **Isti podaci unose se u "Iskaznicu vakcinacije" koja predstavlja ličnu dokumentaciju i koju vakcinisana osoba zadržava kod sebe**, te ih roditelj djeteta kao zakonsku dokumentaciju **čak u nedostatku evidencije** može pokazati ljekaru u privatnoj zdravstvenoj ustanovi, kao i u svakoj drugoj prilici gdje treba dokazivati vakcinalni status

8. Kada je upućen dopis Ministarstva za obrazovanje, nauku i mlade prema Ministarstvu zdravstva u vezi provjere valjanosti ljekarskih uvjerenja koja izdaju privatne zdravstvene ustanove, a kada je Ministarstvo zdravstva KS odgovorilo na upit, jer jasno je iz dokumenata koji su mi predložili roditelji da odgovor na upit Ministarstvo zdravstva **nije ni krajem jula 2020. godine dostavilo**, a roditelji su ljekarska uvjerenja priložili još u aprilskom upisnom roku za koje je Ministarstvo za obrazovanje dopustilo dostavu dokumentacije u junu?

9. U dopisima mnogih škola koje su mi predložili roditelji Ministarstvo za obrazovanje, nauku i mlade je zatražilo dostavljanje **spiska privatnih zdravstvenih ustanova koje mogu izdavati ljekarska uvjerenja** za upis djece u prvi razred, ni taj odgovor Ministarstvo zdravstva **nije na vrijeme uputilo**, a sada se u toku pandemije to slama preko leđa roditelja, **ko će za to odgovarati?**

10. Mnogi roditelji su uporni najavljuju **obraćanje Instituciji ombudsmena u BiH, pokretanju krivičnih prijava za zloupotrebu službenog položaja, privatnih tužbi protiv oba Ministarstva** jer pored jasnog Zaključka najvišeg zakonodavnog tijela Kantona Sarajevo koje nije oprečno važećem pravnom okviru zbog toga što će odbijanjem prihvatanja ljekarskih uvjerenja biti **onemogućen upis i onemogućeno pravo djeteta na obrazovanje** shodno UN

Deklaraciji i Konvenciji o pravima djeteta, Ustavu BIH, Ustavu FBIH i drugim pravnim propisima, **pa se postavlja pitanje pravne odgovornosti oba Ministarstva?**

11. Umjesto da roditeljima **olakšate i ukažete na privatne zdravstvene ustanove** koje imaju čak i potpisan ugovor sa ZZO KS u vezi pružanja primarne zdravstvene zaštite koja uključuje i oblast porodične medicine, **izlažete ih dodatnom stresu i trošku**, te stoga predlažem da razmotrite čak i **opciju refundacije troškova izdavanja ljekarskog uvjerenja iz privatne zdravstvene ustanove**

Budući je početak školske godine uskoro, molim da na ovo zastupničko pitanje dobijem odgovor u što kraćem periodu.”

S poštovanjem,

Neira Dizdarević

Zastupnica Naše stranke u Skupštini Kantona Sarajevo